



# mjesečni Bilten

omladinska mreža bosne i hercegovine

oktobar  
listopad  
2017.

221

## Dragi prijatelji/ce,

Predstavljamo vam oktobarsko izdanje mjesečnog informativnog Biltena Omladinskog resursnog centra (ORC) Tuzla i Omladinske mreže Bosne i Hercegovine, koja za sada broji **183** organizacije i **115** pojedinaca iz **75** mjesta BiH.

Bilten trenutno izlazi na bosanskom-srpskom-hrvatskom i engleskom jeziku.

Bilten sadrži informacije o radu Omladinskog resursnog centra (ORC-a) Tuzla, mjesečne aktivnosti omladinskih organizacija, neformalnih grupa i pojedinaca - članova Omladinske mreže Bosne i Hercegovine, njihove planove za naredni period i ostale korisne obavijesti namijenjene mladima i NVO sektoru (donatorski pozivi za projekte, konferencije, seminare, školarine, stipendije i sl.).

Ukoliko želite da budete na mailing listi za naredna izdanja mjesečnog informativnog Biltena, ili ako imate pitanja ili sugestije, javite nam se. Mjesečni informativni Bilten, kao i arhivu dosadašnjih izdanja možete naći i na web stranici Omladinske mreže Bosne i Hercegovine:

[www.omladina-bih.net](http://www.omladina-bih.net)



### SADRŽAJ

Aktivnosti u oktobru 2017.....	2
Planovi za novembar 2017. ....	6
Aktivnosti članova mreže .....	7
Saopštenja/informacije/donatori/pozivi .....	26

Uživajte u čitanju!

# AKTIVNOSTI ORC/HCA U OKTOBRU 2017.



## Anna Lindh Fondacija Bosanskohercegovačka mreža

### Međunarodna konferencija „Obrazovanje za dijalog (Educate for Dialogue) u Euro-mediteranskoj regiji, Piran, 9. – 10. oktobar

Konferenciju koja je održana je 9. i 10. oktobra u Piranu, Slovenia, organizovala je Anna Lindh Fondacija u saradnji sa Ministarstvom Vanjskih poslova Republike Slovenije, Ministarstvom obrazovanja, nauke i sporta Republike Slovenije i Euro-mediteranskim Univerzitetom (EMUNI).



Emil Balavac, predstavnik Omladinskog kluba Pod istim suncem Jablanica, članice ALF BiH, pozvan je da govori kao uvodničar na panelu „Globalni trendovi u interkulturalnom građanskom obrazovanju“, te da predstavi dobru praksu ostvarenu kroz projekat „Learning indeed“ koji je podržala Anna Lindh Fondacija.

On se u svom govoru osvrnuo na važnost dijaloga i obrazovanja u Euro-mediteranskoj regiji, sa osvrtom i na Bosnu i Hercegovinu. Emil je govorio i o važnosti dijeljenja informacija i znanja, povezivanju na svim poljima u cijelom regionu, ali i o bitnosti učešća mladih

kao aktivnih sudionika u svim tim procesima, kao i u rješavanju izazova koje susrećemo u regionu.

Pored uvodnog govora učesnicima konferencije Emil je predstavio i rezultate "Learning indeed" jednogodišnjeg projekta, koji je imao za cilj da doprinese razvoju interkulturalnog dijaloga među marginalizovanim mladima iz Euro-mediteranske regije obrazujući ih o drugima i 'drugačijima', upoznavajući ih sa stereotipima, predrasudama, diskriminaciji i ksenofobiji, te načinima kako se boriti sa ovim negativnim trendovima.

Ova konferencija je imala za cilj da otvori debatu i zagovara interkulturalno građansko obrazovanje kao centralni alat za interkulturalni dijalog, i da pruži set preporuka za vlade, škole, trenere i druge relevantne aktere u regionu. Pored toga, konferencija je pružila priliku za umrežavanje i dijeljenje dobrih praksi, te kreiranje zajedničkog pristupa promociji interkulturalnog građanskog obrazovanja.



Na konferenciji je predstavljen i nedavno objavljeni Priručnik za interkulturalno građansko obrazovanje u Euro-mediteranskoj regiji Anna Lindh Fondacije.

Učesnici, njih preko 100, na konferenciji iz zemalja Euro-mediteranske regije pored ostalih bili su profesori, istraživači, predstavnici vladinih institucija Republike Slovenije, univerziteta, međunarodnih organizacija, UN-a, Vijeća Evrope, institucija Evropske unije, kao i predstavnici medija i organizacija civilnog društva.

## „Mladi za bolju budućnost“



U okviru projekta „Mladi za bolju budućnost“ koji realizuju članovi Omladinskog resursnog centra u mjesecu oktobru sniman je i emitovan video pod nazivom „Život u Tuzli, 2017. Godina“. Video možete pronaći na sljedećem linku: <https://www.facebook.com/ORCTuzla/videos/1548994761815457/>

Sve čitatelje pozivamo da isti podijele na svojim profilima i na taj način podrže našu želju za društvom mladih bez diskriminacije.



Objavljivanje ovog video materijala je dijelom finansirano grantom Ministarstva vanjskih poslova Sjedinjenih Američkih Država (Department of State). Mišljenja, nalazi i zaključci koji su ovdje navedeni pripadaju autorima i ne odražavaju nužno mišljenja, nalaze i zaključke Ministarstva vanjskih poslova Sjedinjenih Američkih Država.“

## Društvene mreže i borba protiv terorizma

U glavnom gradu Republike Austrije, Beču je 11. i 12. oktobra održan trening na temu izazova koje nosi govor mržnje i ekstremizam na društvenim mrežama, a u organizaciji Facebook-a i OSCE-a. Dvodnevnom treningu prisustvovali su učesnici iz čitave Evrope koji su imali priliku da se umreže i razmjene svoja iskustva. O radu Omladinskog resursnog centra na ovim aktivnostima u Bosni i Hercegovini govorio je naš predstavnik Slobodan Blagovčanin.



## RYCO info sesija

U prostorijama fondacije „Network“ u Sarajevu u četvrtak 26. oktobra održana je info sesija o pozivu za projekte koje je raspisala Regionalna kancelarija mladih za saradnju Zapadnog Balkana. Tokom tročasovne prezentacije, učesnici su se mogli upoznati sa uslovima za apliciranje na gore spomenute fondove.



Zainteresovane organizacije više informacija mogu pronaći na stranici: [www.RYCOWB.org](http://www.RYCOWB.org)

## Omladinska grupa ORC Tuzla

### Samit mladih (Re:Generacija)

U Sarajevu je od 29. septembra do 1. oktobra 2017 godine održan Samit mladih, u sklopu programa „Re:Generacija“. Samit je okupio 150 mladih iz 10 opština u BiH: (Jajce, Stolac, Drvar, Doboje, Brčko, Kotor Varoš, Gornji Vakuf/Uskoplje, Zvornik, Sanski Most i Prijedor)

Cilj Samita, koji se realizuje uz podršku USAID-a, je da pruži učesnicima priliku da učestvuju u nizu radionica, panela i plenarnih sesija na teme kao što su: pomirenje, kultura mira, rješavanje problema u lokalnim zajednicama kroz implementaciju projekata koji zagovaraju pomirenje, kao i ulogu koju film može imati u tom procesu. Organizatori Samita su Međunarodni republikanski institut (IRI) i Magazin Kabare.



Predstavnici Omladinske grupe Omladinskog resursnog centra su bili Amila Selimbašić i Emir Karamujić.

## Konflikt i konflikt transformacija

U Tuzli je 11.10.2017. godine održana radionica na temu konflikta i konflikt transformacije. Radionica je održana u Američkom kutku JU Biblioteke „Derviš Sušić“. Učesnici ovog događaja su bili predstavnici koalicija iz Tuzle.

Glavni cilj radionice jeste da se uvježbaju vještine konstruktivnog rješavanja sukoba. Kroz radionicu su učesnici imali priliku proći kroz kratak teoretski prikaz i jedan primjer bliže ispunjavanju načina za rješavanje problema na zadovoljstvo dvije strane.



Predstavnici Omladinske grupe Omladinskog resursnog centra u Tuzli su bili Amina Džafić i Emir Karamujić

## Jačanje mehanizma za borbu protiv diskriminacije i krivičnih djela počinjenih iz mržnje u Tuzli



19. oktobra je u Tuzli održan okrugli sto na temu „Jačanje mehanizma za borbu protiv diskriminacije i krivičnih djela počinjenih iz mržnje u Tuzli“. Cilj je bio uspostava saradnje nevladinih organizacija s institucijama nadležnim za postupanje u slučajevima diskriminacije. Na okruglom stolu su se okupili predstavnici policije,

sudova, Komisije za ljudska prava i slobode Gradskog vijeća Tuzla i nevladinih organizacija. Učesnici su razgovarali o jačanju kapaciteta predstavnika civilnog društva kako bi, primjenom relevantnih instrumenata i mehanizma, učinkovito prepoznali, izvještavali i reagirali u slučajevima diskriminacije.

Organizator okruglog stola je Koalicija za borbu protiv mržnje iz Tuzle, uz podršku misije OSCE-a u Bosni i Hercegovini. Na okruglom stolu su prisustvovali i članice Omladinske grupe Omladinskog resursnog centra Tuzla, Merita Sokoli i Amila Selimbašić.

## Dan Ujedinjenih Nacija



Edukaciju su vodili Emir Karamujić ispred OGORC- a i Pavle Lakić ispred YES Alumni BiH.

U Američkom kutku Tuzla je 24. oktobra održana radionica povodom Dana Ujedinjenih nacija. Cilj radionice je informisanje ljudi o svrsi, ciljevima i dostignućima UN- a, informisanje o UN- u u Bosni i Hercegovini i diskusija o Ciljevima održivog razvoja i njihovoj implementaciji u BiH. Nakon završetka radionice učesnicima su dodijeljeni certifikati za učešće u radionici.

Radionica je realizovana u organizaciji Omladinske grupe Omladinskog resursnog centra i YES Alumni Bosnia and Herzegovina.

## REDOVNE AKTIVNOSTI ORC I HCA TUZLA

Tokom oktobra radili smo na održavanju i razvoju komunikacija i koordinacije unutar Omladinske mreže Bosne i Hercegovine ([www.omladina-bih.net](http://www.omladina-bih.net)). U okviru toga smo svakodnevno na mejling listu mreže ([posta@omladina-bih.net](mailto:posta@omladina-bih.net)), ali i na druge adrese u Bosni i Hercegovini i regiji distribuirali informacije interesantne za mlade i omladinski aktivizam u BiH. Vršili smo korespondenciju sa organizacijama i pojedincima zainteresovanim za rad mreže, odgovarali na upite vezane za određene aktivnosti, edukacije i ostale informacije vezane za aktivizam mladih u BiH. Isto tako, naš projektni tim nastavio je sa apliciranjima za projekte za narednu godinu.

## PLANOVI HCA/ORC-A ZA NOVEMBAR 2017.

- Sprovođenje redovnih aktivnosti kroz Omladinsku mrežu Bosne i Hercegovine;
- Završetak aktivnosti i izvještavanje o koraku 7 ALF (aktivnosti 2015. – 2017.) Priprema plana aktivnosti ALF Mreže u BiH za naredni period
- Nastavak rada na namicanju sredstava za 2017. godinu.
- U okviru projekta „YOUth 4 better future“ (Mladi za bolju budućnost), u planu su nam obilasci naših partnera na terenu i pripreme za održavanje treninga.

# AKTIVNOSTI ČLANICA OMLADINSKE MREŽE BiH



## Centar za mlade INPUT

Ul. Mokušnice 10, 72000 Zenica

Tel./fax: +387 61 766 532

E-mail: [info@inputcentar.com](mailto:info@inputcentar.com)

Web: [www.inputcentar.com](http://www.inputcentar.com)

Facebook: <https://www.facebook.com/udruzenje.input>

## Održano takmičenje Advertising Challenge Zenica 2017.

U punoj sali Centra za mlade INPUT održano je zanimljivo takmičenje. Mladi ljudi starosne dobi od 18 do 35 godina su komentirali i ocjenjivali reklame svjetskih kompanija i time dali predstavnicima bh. kompanija iz oblasti prehrane, namještaja i usluga, uvid na šta se trebaju fokusirati u formiranju svojih marketing planova. Korist od ovog takmičenja je obostrana, formiranje i iznošenje stava učesnika o određenoj reklami, te pomoć privrednicima kod izrade modernih i inovativnih reklamnih rješenjima.



Uskoro slijedi i takmičenje bh. reklama izjavio je predsjednik INPUT-a, Adi Salčinović.

## Radionica „Lažna sloboda“ u INPUT-u



U Centru za mlade INPUT u mjesecu oktobru je održana radionica „Fake Free/Lažna sloboda“, na temu prisutnosti alkohola u društvu, posebno među mladim ljudima, koji su primarna ciljna grupa alkohol industrije.

Centar za mlade INPUT iz Zenice je članica mreže „Životni stil bez alkohola“, čiji cilj je zaštita djece i mladih kroz afirmisanje zdravih stilova života i kreiranje zdravog i sigurnog okruženja, u okviru

organizacijskih programa, vrijednosti i principa, te prostora u kojima mladi borave.

Ovu radionicu su održali treneri **Centra za edukaciju mladih iz Travnika**, gdje su tokom dvosatne radionice razgovarali sa mladima o društvenim mitovima i alkoholu, nametanjima koja smo naslijedili od prošlih generacija, odnosu pojedinca i društva prema alkoholu, usvajanju ponašanja u odnosu na konzumiranje alkohola kroz rodne uloge, te ulozi i značaju reklamiranja alkohola u podsticanju mladih na njegovo konzumiranje.



Učesnici su bili predstavnici vijeća učenika **Prve gimnazije** i rekli su da ove pojave dosad nisu sagledavali na ovakav način, jer su bile toliko ukorijenjene i sveprisutne, da smo ih svi prihvatili kao sastavni dio života. To ide u prilog činjenici koliko je snažna alkohol inustrija i koliko ne preže ni pred čim kako bi ostvarila svoje ciljeve.

Ove radionice se održavaju u okviru projekta „NEET Inclusion“, koji finansira mreža „ACTIVE – Sobriety, Friendship and Peace“, čiji cilj je promocija i afirmacija zdravih stilova života među mladim ljudima, bez alkohola i drugih droga.

## Robotika i programiranje u INPUT-u

Centar za mlade INPUT već par godina organizuje razne edukacije iz oblasti programiranja i robotike. Jedini smo u Gradu Zenici koji pružamo ovakvu vrstu edukacije za djecu i mlade. Tokom oktobra održani su interaktivni časovi za učenike osnovne škole OŠ „Edhem Mulabdić“ VI razreda, na kojima su učenici imali priliku da usvajaju nova znanja iz oblasti programiranja i robotike. Adi Salčinović, vođa škole programiranja i robotike je istakao kako vlada velika zainteresovanost djece i mladih za ovu oblast. Djeca su imala priliku da se upoznaju i da rade sa Lego Mindstorms robotima, mBot robotičima kao i sa arduinom, raspberry pi i scratch. Na ovaj način kod djece se razvija želja za učenjem programiranja i robotike, zato što kroz praktičan rad imaju mogućnost da pokažu svoju kreativnost i znanja.



## Bosansko - Turski muhabet

U Centru za mlade INPUT je krajem oktobra održano druženje pod nazivom „Bosansko-turski muhabet,“ uz turski čaj i bosansku kafu. Cilj ovog druženja je bio da se omladina druži i razmjeni svoja iskustva sa mladima iz Turske. Mladi iz BiH i Turske su uživali u ugodnoj atmosferi ambijenta omladinskog centra INPUT uz čaj i kafu, gdje su pričali o prirodnim ljepotama Turske i Bosne i Hercegovine, ali i običajima u Bosni i Turskoj, koliko se samo turcizama koristi u BiH. Na kraju su zaključili da jako puno sličnosti ima između Bosne i Turske, kao i da dosta mladih ide studirati u Tursku. Omladinci iz Turske su izjavili kako uživaju kad dođu u Bosnu, i da su bosanci i hercegovci jako ljubazni i pristupačni ljudi, i da BiH posjeduje jako puno prirodnih ljepota i historijskih mjesta.




Institut za  
razvoj mladih KULT



Ul. 4. Viteške brigade  
34 – 36 BA, 71210 Ilidža,  
Sarajevo  
Tel: +387 33 778 778.  
Fax: +387 33 778 79  
E-mail: [kult@mladi.org](mailto:kult@mladi.org),  
web: [www.mladi.org](http://www.mladi.org)

## Biznis forum „Rasterećenjem privrede do novih radnih mjesta“ 8. novembra u Neumu

Biznis forum „Rasterećenjem privrede do novih radnih mjesta“, posvećen privredi i privrednicima bit će organizovan u hotelu Grand u Neumu, 8. 11. 2017. godine.



MLADI.ORG



Poslovni  
Prostor BH



FEDERALNO MINISTARSTVO  
RAZVOJA, PODUZETNIŠTVA I  
OBITA.



PODRŽANO OD



Forum je namijenjen svim privrednicima, mladim preduzetnicima, predstavnicima vladinog, akademskog i nevladinog sektora, studentima/cama i svima koji žele i misle da mogu poboljšati stanje u bh. privredi.

Na forumu će se razgovarati o teretima koji ograničavaju rast i razvoj privrede u Federaciji BiH, sa fokusom na Hercegovačko-neretvanski kanton i općinu Neum, mogućnostima za njihovo prevazilaženje, inicijativama i aktivnostima koje se provode u svrhu ekonomskih reformi, programima i mjerama poticaja zapošljavanju i samozapošljavanju, posebno mladih, te prilikama i preprekama za pokretanje biznisa.

Između ostalog, biće predstavljeni rezultati istraživanja dodjele budžetskih poticaja privredi u periodu 2012-2015., te inicijativa bh. privrednika za plaćanje PDV-a državi po naplaćenim umjesto izdatim računima.

O temama će govoriti predstavnici resornih institucija vlasti, istaknuti stručnjaci iz oblasti ekonomije, poslovnog okruženja i zapošljavanja, privrednici uspješnih preduzeća i mladi preduzetnici.

Biznis forum organizuje Institut za razvoj mladih KULT, pod Visokim pokroviteljstvom predsjedavajućeg Predsjedništva BiH dr. Dragana Čovića, u saradnji s Federalnim ministarstvom razvoja, poduzetništva i obrta i Općinom Neum.

Biznis forum se organizira u okviru inicijative pod nazivom „Poslovni prostor BH“ koju Institut za razvoj mladih KULT od 2014. godine provodi u okviru Projekta održivosti civilnog društva u Bosni i Hercegovini (CSSP), koji realizuju Centri civilnih inicijativa (CCI) i Centar za promociju civilnog društva (CPCD), a koji je podržan od Američke agencije za međunarodni razvoj (USAID).

## Kako učiti, podučavati i pristupiti adolescentima?

U oktobru je u Sarajevu održan prvi modul obuke "Uči, misli i djeluj! za odrasle", a rad sa učenicima u razredu i u školi, bila je samo jedna od tema ovog modula.

„Ovo je jedno veliko osvježanje u mom dosadašnjem profesionalnom iskustvu. Mnogo korisnih informacija. Kako učiti i podučavati, kako pristupiti adolescentima i drugim starosnim grupama, načini držanja časova, tolerancija, kompromis – sve su to teme koje obrađujemo i koje pospješuju moje znanje i zasigurno će me učiniti boljim predavačem.“ – istakla je Nina Neimarlija, profesorica engleskog jezika.



"Uči, misli i djeluj! za odrasle" je obuka neformalnog obrazovanja namijenjena odraslima koji u formalnom obrazovanju direktno rade s djecom i mladima. Ovaj program obuke nastao je kao odgovor na potrebu za pružanjem podrške nastavnom osoblju srednjih škola u razvoju kompetencija potrebnih za uspješno planiranje i realizaciju procesa učenja i podučavanja zasnovanog na principima iskustvenog učenja, korištenje učinkovite i relevantne metode i strategije podučavanja i stvaranje sigurnog i stimulativnog okruženja u kojem će se učenici/e osjećati podržano i motivirano, a ujedno biti osposobljeni da uče tokom cijelog života.

Institut, sa svojim partnerima, organizira obuku u trajanju tri modula po tri radna dana. Obukom Institut želi podržati osobe koje rade s mladima i unaprijediti njihove vještine i znanja za razvoj omladinskog rada i mladih u BiH. Pored obuke, polaznici/e će imati i praktični rad u svojoj zajednici.

Obuku pohađaju polaznici/e iz četrnaest lokalnih zajednica iz cijele Bosne i Hercegovine, koji rade direktno sa adolescentima kroz formalno obrazovanje.

Treneri u okviru ove obuke su Radmila Rangelov-Jusović i Nedim Krajišnik iz Centra za obrazovne inicijative Step by step.

## Reforme privrede nemaju alternativu

Institut za razvoj mladih KULT u oktobru je objavio i treće izdanje Biltena mreže za kreiranje boljeg poslovnog ambijenta u Bosni i Hercegovini pod naslovom „Reforme privrede nemaju alternativu.“

Kroz Bilten je predstavljena Inicijativa za izmjene zakona o PDV-u, te Analiza budžetskih poticaja privredi u BiH u 2015. g. s prijedlogom mjera za unaprjeđenje procesa dodjele.

Ponuđen je i osvrt na dosadašnje održane Biznis forume širom BiH, ali i odgovor na pitanje da li UOUIO raspolaže sa analizom kakve bi efekte na punjenje budžeta imala izmjena zakona po kojem bi se PDV plaćao po naplaćenom računu.

Bilten je nastao u okviru inicijative „Poslovni prostor BH“ koju realizuje Instituta za razvoj mladih KULT, a koja je započeta s ciljem doprinosa rješavanju sistemskih problema u sektoru zapošljavanja, uz uključivanje šireg broja aktera iz poslovnog, javnog i civilnog sektora, kao i medija, udruženih u aktivnu, funkcionalnu i regionalno zastupljenu Mrežu, takozvanu Mrežu za kreiranje boljeg poslovnog ambijenta u BiH. Namjera je da se utemeljenim i usmjerenim zakonodavno-zagovaračkim aktivnostima kreira povoljnija poslovna klima, između ostalog i kroz znatno poboljšane i budžetski ojačane programe podrške malom i srednjem preduzetništvu, uređenje raspodjele različitih budžetskih poticaja privredi te uvođenjem zakonskih olakšica kod naplate poreza i plaćanja doprinosa za novozaposlene.

Mreža je otvorena za sve zainteresirane strane koje smatraju da mogu doprinijeti stvaranju boljeg poslovnog ambijenta i otvaranju novih radnih mjesta u BiH.

Preuzimanje Biltena na [www.mladi.org](http://www.mladi.org)





**PRONI Centar za omladinski razvoj**  
Ul. Mehmedagića 24, 76100 Brčko distrikt BiH  
Tel./Fax: +387 49 217 695  
E-mail: [pronibrcko@teol.net](mailto:pronibrcko@teol.net)  
[www.pronibrcko.ba](http://www.pronibrcko.ba)

## PRONI Centar za omladinski razvoj predstavio novi projekat „Omladinski radnici u borbi protiv nasilnog ekstremizma“



Predstavnici PRONI Centra za omladinski razvoj, u srijedu, 25.oktobra, predstavili su novi projekat, pod nazivom „Youth Workers Countering the Violent Extremism“, u okviru kojeg će 30 mladih ljudi iz sjeveroistočne Bosne, a prema javnom pozivu, proći jednogodišnju obuku o tome kako prepoznati nasilne oblike ponašanja na internetu, kroz školske i druge ustanove, odnosno u svakodnevnom životu.

Poziv za učesnike otvoren je do 16. novembra i nalazi se na zvaničnoj stranici PRONI-a.

## PRONI učestvovao na info sesiji u Sarajevu

PRONI Centar na info sesiji u [Foundation Networks](#) koju organizuje [Regional Youth Cooperation Office - RYCO](#). Više o tome šta RYCO radi na njihovoj web stranici: [www.rycowb.org](http://www.rycowb.org)

## PRONI centar učestvovao na Forumu

PRONI Centar učestvovao je na forumu "Podsticanje socijalnog preduzetništva u BiH" koji organizuje [CDP "Globus"](#). Projekat je podržan od Ambasade Kraljevine Holandije u Sarajevu.





## Udruženje studenata Medicinskog fakulteta u Tuzli "Medicus"

Univerzitetska br. 1., 75 000 Tuzla

Tel: predsjednik: 00 387 (62) 944-739; sekretar: 060/3101-602;

Telfax: 035/320-600(1).

web: [www.us-medicus.ba](http://www.us-medicus.ba);

e-mail: [medicus.tz@gmail.com](mailto:medicus.tz@gmail.com); [info@us-medicus.ba](mailto:info@us-medicus.ba)

## MEDICUS i UKC Tuzla u borbi protiv moždanog udara

"Svjetski dan borbe protiv moždanog udara" je globalni projekat koji se već tradicionalno održava u Bosni i Hercegovini u nekoliko gradova, gdje centralno mjesto zauzima Tuzla sa svojim projektnim aktivnostima. Projekat je vođen od strane Udruženja studenata Medicinskog fakulteta Univerziteta u Tuzli "MEDICUS", u saradnji sa Klinikom za neurologiju Univerzitetskog kliničkog centra Tuzla.



S obzirom na poražavajuće rezultate o godišnjoj stopi oboljevanja od moždanog udara te manjka informiranosti građana, centralna aktivnost projekta pripala je javnoj tribini pod nazivom "Moždani udar se može spriječiti i liječiti", koja se održala na Medicinskom fakultetu Tuzla u petak 27.10.2017.



Na početku tribine svim prisutnima se obratio prof.dr. Dževdet Smajlović, kao načelnik Klinike za neurologiju UKC Tuzla, doc.dr. Zikrija Dostojić, šef Odjela jedinice za liječenje moždanog udara Klinike za neurologiju UKC Tuzla, kao i predsjednik udruženja studenata "MEDICUS", Sejfo Begić. Pored navedenih, na javnoj tribini su predavanje držali i koordinatori projekta Rabić Ilvana i Mujanović Adnan, s osvrtom na aktivnosti u toku prethodnih godina i historiju moždanog udara. S obzirom da su ove godine pored Tuzle, projektne aktivnost obuhvatile i druge opštine, prisutnima se obratila i dr. Edina Čamdžić, kao koordinatorica projekta u dijelu za opštinu Gračanica.

Nakon prvog dijela tribine uslijedila su pitanja svih učesnika, koji su se mogli dodatno informisati o moždanom udaru. Učesnici javne tribine su bili većinom pripadnici mlađe populacije, što ukazuje na veliku osvještenost mladih kada je u pitanju ovo oboljenje i želja za dodatnim informisanjem. Nažalost, manjak učesnika starije populacije dokaz je nezainteresiranosti ove grupe za promociju zdravlja, što se odražava na poražavajuću

statistiku visoke stope oboljenja i smrtnosti. Učešće na javnoj tribini su uzeli građani Tuzlanskog kantona, predstavnici brojnih ustanova i organizacija, učenici i nastavnici srednjih škola, te drugi zainteresirani.

Pored javne tribine, na sam datum obilježavanja borbe protiv moždanog udara, u nedelju 29.10. održane su dvije promocije zdravlja u Bingo City Centru i u Merkator Centru Tuzla, gdje su građani mogli besplatno dobiti informacije o moždanom udaru, izmjeriti krvni pritisak, nivo masti u krvi i dr. Obje promocije su okupile veliki broj građana koji su dobili sve potrebne informacije o riziko-faktorima moždanog udara, zahvaljujući partneru projekta KRKA pharmaceuticals, koji su donirali potrebnu opremu za ove aktivnosti.





## HO „PARTNER“ Banja Luka

Ul. Srđe Zlopogleđe 55, 78000 Banjaluka

Tel./fax: +387 51 250 730

E-mail: partner@teol.net

Web: www.hopartner.org

### Uspješno održan „Uhvati film BiH“



Filmski festival „Uhvati film“ održan je u Banjoj Luci u petak, 13. oktobra, u organizaciji HO „Partner“ u Muzičkom paviljonu „Staklenac“. Zahvaljujući saradnji HO „Partner“ i Kreativno-afirmativne organizacije Parnas iz Novog Sada, Filmski festival o osobama sa invaliditetom, koji se u Banja Luci održava od 2011. godine postao je dio regionalnog festivala koji se još održava u Novom Sadu (Srbija) i Rijeci (Hrvatska).

Za vrijeme trajanja konkursa za prijem filmova pristiglo je 724 filma iz svih krajeva svijeta: Indije, Irana, Amerike, Španije, Italije i Rusije.

Žiri je imao težak zadatak da odabere filmove koji će se prikazati na Festivalu.

Ovogodišnji festival je pripremila mlada ali perspektivna ekipa na čelu sa direktoricom Festivala Dušicom Lipovac, a spremni su da rade na tome da Festival "Uhvati film" bude iz godine u godinu sve bolji.

Od ove godine imamo i novog člana tima a to je KAMERKO – maskota Festivala koja je nastala kroz ideje našeg tima. Naslikale su ga vješte ruke Mile Mičića izvlačeći ga iz svijeta mašte, a postala je opipljiva u radionici „Lukac“ iz Beograda.

Jedan od glavnih ciljeva organizatora je i da se u godinama koje dolaze „Uhvati film“ nađe na kulturnoj mapi Grada Banjaluke, Republike Srpske i BiH.

Festival je svečano otvorila glumica Narodnog pozorišta RS Slađana Zrnić ističući važnost održavanja „Uhvati film“ festivala:

„Popularizovanjem raznih manifestacija, događaja, projekata, aktivnosti promoviše se umjetnost koje stvaraju osobe sa invaliditetom a i njihov aktivizam i rad doprinosi poboljšanju društvenog položaja. Ovaj festival je od kulturnog značaja ne samo za naš grad već i cijeli region“ istakla je Zrnićeva.

Specijalni gosti bila su djeca iz Servis centra "Dajte nam šansu-Zvezdice", koji su svojim plesnim tačkama uljepšali Festival.

Projekciju je otvorio film „Inner me“ Antonia Spana, koji je učestvovao na mnogim međunarodnim filmskim festivalima a njegovo prikazivanje i popularnost nastavljaju da rastu. To je dokumentarni film o ženama sa invaliditetom i hrabrosti. Na Međunarodnom filmskom festival „Uhvati sa mnom ovaj dan!/Uhvati film“ koji je održan u Novom Sadu dobio je nagradu za najbolji dokumentarni film, a istu nagradu osvojio je i u Kanu 2016. godine.



Na ovogodišnjem festivalu prikazani su filmovi iz različitih krajeva svijeta koji mijenjaju perspektivu javnosti prema osobama sa invaliditetom. Mnogi od filmova su nagrađivani kako na festivalu u Novom Sadu, tako i na međunarodnim filmskim festivalima. Svim ovi filmovi šalju snažne poruke: hrabri da jaki idemo kroz život možemo savladati sve prepreke, predrasude, diskriminaciju, želje se ostvaruju ako čvrsto vjerujete u njih, a invaliditet nije prepreka i ne smije da bude u ostvarivanju životnih ciljeva, o značaju implementacije UN Konvencije o pravima osoba sa invaliditetom, značaj personalne asistencije za OSI...



U toku festivala bila je postavljena izložba fotografija „Osobe sa kvalitetom“, te su dodjeljene plakete i nagrade nagrađenim autorima:

1. Armin Durgut iz Sarajeva,
2. Milica Ijačić iz Trebinja,
3. Borislav Zdrinja iz Banjaluke.

Tokom festivalskog dana održana je i debata na temu „Osobe sa kvalitetom“ a učesnici su bile uspješne ličnosti iz oblasti sporta, umjetnosti, filma, novinarstva: Milica Ijačić, Adisa Kišić, Anja Kavić, Maja Isović Dobrijević, Igor Ignjatović i Dajana Tadić.



Kao i prethodnih godina festival su posjetioci festivala, pored banjalučke publike, su bili gosti iz Tuzle, Prijedora, Trebinja.



## H.O. MUSLIMANSKO DOBROTVORNO DRUŠTVO – MERHAMET DOBOJ

Ul. Kralja Aleksandra 17, 74000 Doboje

Tel./fax: +387 53 226 886

E-mail: [merhamet.doboj@cutuk.net](mailto:merhamet.doboj@cutuk.net)

FB: [www.facebook.com/Merhamet-Doboj](https://www.facebook.com/Merhamet-Doboj)

Osim stalnih aktivnosti Merhameta Doboje, koje podrazumjevaju: evidentiranje članarine, štampanje korisnicima molbi, žalbi, raznih dopisa ,fotokopiranja, rada sa članovima, pružanja informacija, raspodjela humanitarne pomoći, izrade projekata i prisustva seminarima, okruglim stolovima drugim sesijama, Merhamet je tokom oktobra radio i:

### Sastanak Koalicije „Tolerantno i pozitivno“

Održan je 4. Oktobra, povodom međunarodnog dana starijih osoba. Na sastanku smo se dogovorili o aktivnostima koje slijede. Isto tako posjetili smo i biblioteku u Doboju, gdje su smještene informacije o Ani Frank. Ovom prilikom svi koji su bili prisutni mogli da saznaju mnogo informacija o životu Ane Frank, o tome kroz kakve je sve patnje kroz ona i njena porodica prolazila. Izlaganje je vrlo bilo interesantno i poučno za sve koji su bili prisutni.



11.oktobra održan je sastanak regionalnog Merhameta Banja luka, na kome su sumirani rezultati dosadašnjeg rada i predložene aktivnosti za ubuduće.

Aktivisti “ Merhameta” Doboje imali su priliku da prisustvuju sastanku u Maglaju, koji je održan povodom dolaska predstavnika “Medicament Solidaris”. Na sastanku je bilo riječi o samom stanju u Doboju, o stanju sa “Merhametima” i finansijskim sredstvima. Razgovor se odnosio na aktivnosti za nastavak saradnje povodom donacije lijekova, jer je njihova pomoć od velikog značaja za socijalno ugrožene kategorije. U proteklim donacijama navedene organizacije se radilo na tome da se donator obavijesti o svakom izdatom lijeku i da se korisnici fotografišu prilikom preuzimanja lijekova, te su se slale povratne informacije. Nadamo se da ćemo i u budućnosti imati uspješnu saradnju, kao i do sada.





## Udruženje oboljelih od šećerne bolesti "Novi život"

Ul. Bana Kulina 40, 80240 Tomislavgrad

Tel.: +387 34 353 006, +387 63 158 142

E-mail: [dijabetesnovizivotomgr@gmail.com](mailto:dijabetesnovizivotomgr@gmail.com)

### Akcija mjerenja šećera u krvi

Udruga dijabetičara „Novi Život“ Tomislavgrad je 24. oktobra u OŠ „Stjepan Radić“ Stipanići provela akciju mjerenja šećera u krvi u cilju ranog otkrivanja i pravovremenog liječenja dijabetesa. Ovoj akciji je pristupilo dosta učenika od prvog do petog razreda, ali i djelatnika škole. Akcija je provedena uz suglasnost roditelja i u suradnji s Domom zdravlja Tomislavgrad. Svi učenici su dobili edukativni materijal, kako bi se što bolje informisali o ovoj bolesti. Akciju planiramo nastaviti i u drugim školama u ruralnim područjima tomislavgradske općine.



Akciju smo provodili i u OŠ Mokronoge.





## Omladinsko udruženje Nova vizija

Ul. Opara bb, 72290 Novi Travnik

Tel./fax: +387 61 309 687, +387 61 593 773

E-mail: [ounovavizija@gmail.com](mailto:ounovavizija@gmail.com)

Facebook: <https://www.facebook.com/ounovavizija>

U sklopu projekta **Sveobuhvatni pristupi uključivanja mladića i medija u prevenciji nasilja prema ženama i nasilja u porodici u Bosni i Hercegovini – Inicijativa mladića**, u Travniku je na Trgu Europe održana kampanja pod nazivom „**Možda me čuješ**“. Kampanju su realizovali članovi „**Budi muško klub**“ Travnik koje okuplja omladinsko udruženje „**Nova vizija**“, čije je sjedište u Novom Travniku.



Kampanji su prisustvovali i članovi partnerske organizacije Perpetuum Mobile (Banja Luka), predstavnica UN Women ureda u BiH, predstavnici Centra za socijalnu pomoć Novi Travnik. Svoju veliku podršku dali su i pripadnici policijske stanice Travnik, koji su mladima uputili riječi podrške, ali i prepoznali važnost ovakvih akcija.



Članovi udruženja su izveli performans, čija je tematika nasilje nad ženama, nakon čega su sa transparentima prošetali kroz grad i razgovarali s građanima o ovom globalnom problemu. Bila je ovo prilika da se građani Travnika upoznaju sa radom Budi muško kluba, kampanjama koje provode mladi, ali i daju svoj doprinos u borbi protiv ove negativne pojave, koja je nažalost prisutna u našem društvu. Multisektorskim pristupom i istinskom borbom svi zajedno možemo mijenjati ovo društvo i raditi na smanjenju nasilja, a edukacija mladih ljudi prepoznata je kao najbolji model. Program Mladi koji se koristi u metodologiji rada „Budi muško“ kluba Travnik međunarodno je priznat i provodi se u još nekoliko gradova naše zemlje, ali i zemljama regiona. Dio programa odnosi se na direktnu saradnju sa školama, realizaciju vršnjačkih radionica, treninge za vršnjačke edukatore, performansi i akcije u zajednici. Mladima je ovo prilika da kroz razvijenu metodologiju uče o borbi protiv nasilja, rade na promociji zdravih životnih stilova, ali i druže sa sa vršnjacima koji žele sigurnije društvo. Mladi ljudi žele dati svoj doprinos u borbi protiv nasilja nad ženama, a naša je zadaća podržati njihove napore. Nova vizija u saradnji sa partnerskim organizacijama i institucijama nastavlja sa sličnim aktivnostima i u narednom periodu.

**OMLADINSKA ORGANIZACIJA "SVITAC"**

Ul. Jusufa Čampare bb, 76100 Brčko Distrikt BiH

Tel./Fax: +387 49 211 032

E-mail: [svitac@gmail.net](mailto:svitac@gmail.net)Web: [www.svitac.org](http://www.svitac.org)FB: [www.facebook.com/omladinska.svitac](https://www.facebook.com/omladinska.svitac)**Dnevne radionice**

Omladinska organizacija Svitač je u oktobru nastavila sa svakodnevnim aktivnostima. Učesnici su podijeljeni u dvije grupe, uzrast 4-7 godina svakim danom od 11:00-13:00, a uzrast 8+ od 14:00-15:30 časova. Koordinator jutarnjih radionica je pripremio plan aktivnosti za neformalno učenje kroz igru, maštovitost i kreativnost. U toku mjeseca za uzrast 4-7 godina su se organizovale kreativne radionice, gdje su učesnici pravili od papira knjige, jabuke, zečeve, žabe. Takođe su naučili nove riječi iz engleskog vezane za godišnja doba, mjesece i životinje, te su počeli učiti tekst pjesmice i nastavili sa alfabetom na našem jeziku. Jedan dan u sedmici je planiran za zajedničko gledanje crtanih filmova i takmičarske igre. Materijali koji su se koristili za realizaciju ovih radionica su ljepilo, karton, kolaž papir, blokovi za crtanje, voštane boje, flomasteri, drvene i vodene bojice. Cilj ovih aktivnosti kao i do sada je da djeca razviju maštu i da koristeći razne materijale izraze svoju kreativnost, takođe da razviju motoriku i poštovanje prema drugom i usvoje lijepo ponašanje. Ovaj mjesec je do 20 učesnika pohađalo jutarnje dnevne radionice.

Poslepodnevna grupa prati raspored koji je svaki dan drugačiji, pokušavajući obuhvatiti što više različitih tema i aktivnosti. (uzrast 8+). Ponedjeljkom je na rasporedu kreativna radionica i kreativno izražavanje. Ovaj mjesec učesnici su svoju kreativnost izrazili kroz pravljenje torbica od starih majica, kutijica za olovke i kroz origami – tehniku savijanja papira. Utorkom su radionice engleskog jezika, komunikacija, izgovor, te razne igre koje pospješuju učenje stranog jezika u grupi. Grupa je ovaj mjesec pored gramatičkih zadataka vježbala komunikaciju na engleskom jeziku na temu domaće životinje, godišnja doba i vremenski uslovi.

Srijedom su radionice turskog jezika, gdje su učesnici imali priliku da usvoje osnove turskog jezika, te vokabular godišnjih doba i vremenskih prilika. Svakog četvrtka je grupa učesnika podijeljena u dvije manje i učesnici imaju mogućnost da izaberu jednu od sportskih aktivnosti: tenis, badmington ili odbojku, ili neku od stanica sa mini igrama takmičarskog duha. Učesnici imaju mogućnost da se okušaju u društvenim igrama i timskom radu, razvijajući osjećaj za poštovanje drugog, socijalizaciju i fer igru.

Petkom su na rasporedu radionice njemačkog jezika, gdje učesnici uz igru i timski rad imaju priliku da urade školsku zadaću, poboljšaju komunikaciju i vokabular te kroz igru nauče dodatne riječi vezane za životinje, godišnja doba, vremenske prilike ili da se kroz igru memorije na njemačkom i druženje zabave.

Radionice se održavaju u Omladinskom centru Brčko distrikta.



## „Pričajmo njemački“ – radionice komunikacije na njemačkom jeziku sa izvornim govornicima

Radionice njemačkog jezika se održavaju svakog četvrtka u prostorijama Omladinskog centra Brčko distrikt od 17:30-19:30 časova. Na početku radionica koordinator na njemačkom jeziku postavi par pitanja iz opšteg znanja, te na taj način uvede grupu u zadatke. Ovaj mjesec je grupa radila na komunikaciji i nastavila rad na tekstovima prilagođenim njihovom poznavanju njemačkog. Grupa je takođe radila vježbanje slušanja, te pisanje i čitanje. Radionice komunikacije na njemačkom jeziku su namijenjene za sve koji žele naučiti osnove gramatike, ali i usavršiti već postojeće znanje i steći nova iskustva i poznanstva.

## „I love English“ – radionice komunikacije na engleskom jeziku sa izvornim govornicima



Radionice engleskog jezika se održavaju svake srijede u prostorijama Omladinskog centra Brčko distrikt od 19:00-20:00 časova. Radionice komunikacije na engleskom jeziku su namijenjene svima koji žele naučiti osnove gramatike, upotrebu svakodnevnih fraza i drugih elemenata, ali i usavršiti već postojeće znanje i steći nova iskustva i poznanstva.

## „Učimo Turski“ – radionice komunikacije na turskom jeziku sa izvornim govornicima

Radionice turskog jezika se održavaju utorkom u prostorijama Omladinskog centra Brčko distrikt od 18:00-19:00 časova. Radionice komunikacije na turskom jeziku su namijenjene za sve koji žele naučiti osnove gramatike, upotrebu svakodnevnih fraza i drugih elemenata, ali i usavršiti već postojeće znanje i steći nova iskustva i poznanstva. Učesnici su ovaj mjesec vježbali svakodnevne, jednostavne dijaloge.

## Sportske radionice

Sportske radionice se održavaju utorkom i četvrtkom od 16:00-17:00 časova u prostorijama Omladinskog centra Brčko distrikt i namijenjene su mladim ljudima koji žele da poboljšaju motoriku, kondiciju i tjelesnu snagu, te da steknu nove vještine i poznanstva.

## Radionice gitare

Učesnici radionice gitare su nastavili sa redovnim radom.

## Radionice sambe

Učesnici ove radionice ponavljali su kompozicije iz prethodnih mjeseci.

## Evropski dan jezika

Omladinska organizacija Svitac je 26.09.2017. u Omladinskom centru Brčko, u suradnji sa Glossa – centar za njemački jezik Brčko, obilježila Evropski dan jezika. Od 14 do 16 časova vrata Omladinskog centra su bila otvorena za sve zainteresovane za kreativno –jezičke radionice (engleski, njemački i turski jezik), crtani film - Die Ratatouille Maus - u 17:30 i film – Fackju Göhte - u 19:30 za uzrast 16+.

Uz igru i zabavu najmlađi su imali priliku naučiti osnovni vokabular iz njemačkog i turskog jezika na temu jesen i domaće životinje, dok su na engleskom jeziku rješavali zagonetke i križaljke. Na radionicama je učestvovalo preko 40 učesnika.



## Međunarodni dan nenasilja



Omladinska organizacija Svitac je 02.10.2017. godine zajedno sa malim i velikim drugarima obilježila Međunarodni dan nenasilja. Najmlađi učesnici (4-7 god.) su kroz igru i aktivnosti postali vitezovi mira i prijateljstva Omladinske organizacije Svitac. Održana je diskusija prilagođena njihovom uzrastu na temu šta je to nasilje, te su učili da postoji verbalno i fizičko nasilje. Nakon toga su spomenuli šta oni kao vitezovi treba da urade, kako ne bi došlo do nasilja, te su zaključili da trebaju biti dobri drugari, da paze i poštuju sebe, druge i okolinu i da pomažu kad god mogu. Ako bi vidjeli da netko čini nešto loše većina učesnika radionice je rekla da bi to rekli odrasloj osobi ili bi ga ignorirali. Na kraju radionice na radnom listu su svi nacrtali viiteza u oklopu koju je predstavljao njih, a umjesto mača vitez je djelio je cvijeće kao

simbol pažnje i ljubavi.

Učesnici iz starije grupe su imali malu igru koja ih je podstakla da nađu rješenja za probleme kroz nenasilne načine. Zatim su imali diskusiju, takođe prilagođenu njihovom uzrastu na temu nenasilje. Na postavljena pitanja su odgovorili, da koliko god da je neki problem ili neka situacija, u kojoj se oni nalaze, zamršena mogu naći rješenje na miran način, a ne da koriste nasilje ili poruke mržnje.

U drugom dijelu radionice učesnici su pravili poster na kojem su se našle poruke mira i ljubavi na srpskom/bosanskom/hrvatskom, engleskom, makedonskom, turskom, kineskom i njemačkom jeziku.



Za novembar se planira nastavak svih redovnih radionica Omladinske organizacije Svitac.



## Omladinski klub "DIJAMANT"

Ul. Bučići 42, 70101 Jajce

Tel./fax: +387 30 279 444, 61 179 209, 63 366 811

E-mail: [m.sekib@bih.net.ba](mailto:m.sekib@bih.net.ba)

WEB: [www.ocd-dijamant.net](http://www.ocd-dijamant.net), [www.dijamantmoda.com](http://www.dijamantmoda.com)

## Sport je najbolja komunikacija

U okviru Projekta „Sport je najbolja komunikacija“, mladi mirovnjaci iz Jajca i Donjeg Vakufa, tragali za blagom u Banja Luci. U okviru planiranih aktivnosti Omladinskog kluba "Dijamant" i ŽOK "Jajce-Nansen" mladih omladinske organizacije "DVOČ" iz Donjeg Vakufa boravili su u Banja Luci, a cilj je bio da mladi na tri lokacije otkriju blago Banja Luke. Sve značajne lokacije su posjećene i otkrivene. Učesnici su takođe kroz radionicu "Ljepote u različitosti" dodatno obogatili svoje znanje o tradiciji, kulturi, običajima, historijskim i prirodnim ljepotama Banja Luke.



Mišljenja učesnika ukazuju na to da se upravo u toj različitosti krije bogatstvo i ljepota Bosne i Hercegovine, i ta različitost ne treba da nas razdvaja, nego da je njegujemo i veličamo.

Svi učesnici su bili uključeni u planirane projektne aktivnostima. Imali su zadatak da otkriju tri lokacije u gradu, a imali su pravo da im pomognu građani i mladi Banja Luke. Na ovaj način su mladi direktno učestvovali u pronalasku blaga i ojačali interakciju između građana i mladih, a takođe su mogli da prepoznaju predrasude i stereotipe tokom kontakata sa građanima.

## Posjeta mladih Jajca mladima Šipova

Članovi omladinskog klub "Dijamant" i članovi ŽOK "Jajce-Nasen" u okviru projekta "Sport je najbolja komunikacija" bili su u posjeti mladima u Šipovu, koji su ih srdačno primili. Svi učesnici su se družili, igrali razne sportske igre, a najinteresantnija je bila ženska odbojka.

U sklopu aktivnosti organizovali smo radionicu za sve učesnike na temu: "Ja volim različitost i nemam predrasude". Učesnici su imali priliku da nauče kako razumjeti toleranciju, kako se boriti protiv predrasuda i jačanju uzajmnog dijaloga.

Danas smo fenomenalno družili, učili jedni od drugih, a domaćin je osigurao osvježavajuća pića za sve učesnike. Organizator, na čijem je čelu bila Ranka, zaslužuje veliko poštovanje. Takođe, dogovorili smo da u bliskoj budućnosti organizujemo naš susret u Jajcu – rekao je Šekib Makić, predsjednik OK "Dijamant".

Preko 100 mladih je uzelo učešće kroz razne aktivnosti 35 iz Jajca i oko 70 iz Šipova. Školska sala bila je premala da bi svi mogli uzeti učešća, jer je bilo i neformalnih grupa koje su bile voljne da se uključe u događaj.

Ovakav vid susreta treba nam češće, jer imamo priliku da jačamo interakciju, uspostavljamo nove međusobne veze, toleranciju, razmjenimo iskustva, dogovorimo nove aktivnosti, upoznamo, razmjenimo brojeve telefona, dogovorimo komunikaciju putem društvenih stranica, rekla nam je Amina Mrkonja, jedna od učesnica.

## Sportski događaji u Jajcu

U jajcu je 20. Oktobra uspješno završen sportski događaj, a povodom implementacije projekta "Sport je najbolja komunikacija", koji implementira Omladinski klub "Dijamant" Jajce.

Prvo mjesto osvojila je ekipa OŠ 'Braća Jezerčić' Divičani, u konkurenciji 2004 godište, a u konkurenciji 2006 Odbojkaški klub "AS" iz Donjeg Vakufa, treće mjesto ŽOK."Jajce-Nansen" 2007 Treće mjesto Makljen Prozor/Rama – godište 2006.



Učešće na sportskim susretima uzelo je 14 ekipa svih uzrasta od 2004-2008.godine.

Mladi iz Donjeg Vakufa učestvovali su sa dvije ekipe, ukupno 16 učesnika.

Mladi iz Prozora/Rama učestvovali sa dvije ekipe, 18 učesnika

Ženski odbojkaški klub "Jajce-Nasen" učestvovali sa dvije ekipe, 20 učesnika

OŠ. "Jajce" Krušica, učestvovali sa dvije ekipe, 50 učesnika.

Osnovna škola "Berta Kučera" Jajce, učestvovali sa dvije ekipe, 60 učesnika

Osnovna škola "13.rujan" Jajce učestvovali sa jednom ekipom, 42 učesnika

Osnovna škola "Braća Jezerčić" Jajce učestvovali sa jednom ekipom, 9 učesnika



*"Ovaj projekat je omogućila velikodušna podrška američkog naroda, putem Američke ambasade u Sarajevu. Svi stavovi, mišljenja i zaključci izneseni ovdje ne odražavaju nužno stav Američke ambasade ili Vlade SAD. već isključivo autora"*

# SAOPŠTENJA / INFORMACIJE / DONATORI / POZIVI

## Direktorij donatora Mreže za izgradnju mira

Direktorij donatora u BiH je vodič o izvorima finansiranja za organizacije civilnog društva u Bosni i Hercegovini ali i regiji, tj. post-jugoslovenskim zemljama.

U Direktoriju možete pronaći informacije o 574 donatora i poziva za projekte sa uredima donatora u BiH i/ili svijetu, a koji finansiraju aktivnosti u BiH i/ili regionu. Što je značajno za ovaj direktorij je da organizacije civilnog društva na jednom mjestu mogu pronaći informacije o različitim programima, aktivnostima i geografskom području koje određeni donatori finansiraju, rokovima za prijave, kriterijima podobnosti, načinima apliciranja i kako ostvariti kontakt.

Nakon pauze od pune dvije godine objavili smo ovo jedanaesto izdanje, a plan je u narednom periodu Direktorij ažurirati i dopunjavati sa informacijama o novim donatorima, rokovima za apliciranje i informacijama o kriterijima finansiranja.

Direktorij donatora je pripremila Mreža za izgradnju mira, koalicija koja okuplja 105 organizacija i 15 škola koje rade na čitavoj teritoriji Bosne i Hercegovine. Ako ste zainteresirani za uključivanje pišite Aleksandru Žolji ([sekretarijat@hcabl.org](mailto:sekretarijat@hcabl.org)) ili Goranu Bubalu ([goran.bubalo@mreza-mira.net](mailto:goran.bubalo@mreza-mira.net)).

Ideja je da Mreža za izgradnju mira u saradnji sa svojim članicama sve aktivnosti usmjerava ka obnovi kvalitete društvenog i ekonomskog života u BiH, djeluje u cilju dugoročnog povećanja sposobnosti cijelog bh. društva u ophođenju s različitostima i sukobima na konstruktivan i nenasilan način, te na taj način stvori preduslove i okvir za zajedničko, koordinirano djelovanje niza nevladinih organizacija, lokalne uprave i samouprave, poslovnog sektora, medija i državnih institucija.

U našem radu utičemo na konkretne inicijative vezane za područja javnih politika koje su prepoznate kao ključne za dugoročnu izgradnju mira u BiH, a to su: obrazovanje, sigurnost, regionalni razvoj, zaštita i promocija ljudskih i manjinskih prava, suočavanje s prošlošću i tranziciona pravda, rodna ravnopravnost, kultura javnog dijaloga i demokratije, jačanje kapaciteta civilnog društva za izgradnju istinskog mira, vraćanje povjerenja među bh. narodima, konstruktivnije djelovanje na vladajuće političke strukture u BiH i poboljšanje suživota u BiH.

Direktorij donatora možete skinuti u nastavku (dokument ima 11 Mb): [Direktorij donatora, april 2017, Mreza za izgradnju mira](#)

## National Endowment for Democracy (Nacionalna fondacija za demokratiju)

NED podržava projekte koji promoviraju političko i ekonomsko oslobođenje, jako civilno društvo, neovisne medije, ljudska prava i vladavinu prava. NED-ov fleksibilan i efikasan program donacija ima mogućnost podržati aktiviste/kinje u različitim situacijama, kao što su zemlje u tranziciji gdje je cilj demokratska konsolidacija, te autoritarne zemlje gdje je cilj liberalizacija i zaštita ljudskih prava.

NED je zainteresiran za podršku projektima lokalnih, nezavisnih organizacija sa nestranačkim programima koji žele:

- promicati i braniti ljudska prava i vladavinu prava,
- podržavati slobodu informacija i nezavisne medije,
- jačati demokratske ideje i vrijednosti,
- promicati odgovornost i transparentnost,
- jačati organizacije civilnog društva,

- jačati demokratske političke procese i institucije,
- promicati građansko obrazovanje,
- podržavati demokratsko rješavanje sukoba,
- promicati slobodu udruživanja, i
- jačati široko zasnovanu tržišnu privredu.

Svi predloženi projekti moraju biti u skladu s opštom svrhom rada NED-a kao što je navedeno u [NED STATEMENT OF PRINCIPLES AND OBJECTIVES](#).

Veličina donacije ovisi o veličini i opsegu projekta, ali prosječna veličina granta je 50.000 USD za projekte sa trajanjem od 12 mjeseci.

Odluke o finansiranju se donose tromjesečno na osnovu odluke Odbora NED fondacije. Osim evaluiranja kako se program uklapa u generalne ciljeve NED-a, Odbor razmatra i faktore kao što je hitnost programa, njegova relevantnost u odnosu na specifične potrebe i uslove u svakoj zemlji, te demokratska posvećenost i iskustvo aplikanta.

Zadnji rok prijave projekata u 2017. godini je 22. decembar/prosinac.

Molimo vas da pogledate <http://www.ned.org/apply-for-grant/en/> za više informacija.



## Dragi prijatelji,

*Ukoliko ste zainteresovani da se u mjesečnom informativnom biltenu Omladinskog resursnog centra (ORC) Tuzla i Omladinske mreže Bosne i Hercegovine objave: vaši pozivi za zajedničke aktivnosti i saradnju, informacije o aktivnosti, konkursi za radna mjesta, apeli za pomoć ili podršku, saopštenja za javnost i svi drugi nekomercijalni oglasi, možete se javiti na jednu od dole navedenih adresa.*

*Rok za dostavljanje informacija za svako naredno izdanje je 30-ti u mjesecu.*

*Adrese za slanje vaših informacija za mjesečni bilten:*  
**Omladinski resursni centar  
Tuzla  
Hadži Bakirbega Tuzlića 1  
75000 Tuzla  
tel/fax: 035 258 077  
e-mail: [orcuzla@bih.net.ba](mailto:orcuzla@bih.net.ba)  
[hcatuzla@bih.net.ba](mailto:hcatuzla@bih.net.ba)**

*Mjesečni bilten uređuje  
Omladinski resursni centar -  
ORC Tuzla*

*Prevod Biltena na engleski:  
**Stefan Cvijanović** – prof.  
engleskog jezika*

*WEB stranica Mreže:  
**[www.omladina-bih.net](http://www.omladina-bih.net)***

*Mejling lista Mreže:  
**[posta@omladina-bih.net](mailto:posta@omladina-bih.net)***

*Webmaster:  
**[emir.delalic@gmail.com](mailto:emir.delalic@gmail.com)***